

COMMUNICAZIUN A LAS MEDIAS

Poschiavo, ils 14 da settember 2026

Resultat semestril 2026

Repower cun in bun resultat semestril malgrà l'idrologia debbla

Cun in resultat operativ (EBIT) da 51 milliuns francs ed in gudogn da gruppa da 34 milliuns francs fa Repower in bun resultat per l'emprim mez onn 2026. Contribuì considerablament al resultat semestril ha il commerzi d'energia internaziunal, entant che l'idrologia debbla en consequenza da pauca marschauna e gronda sitgira ha diminuì il resultat. Sper la modernisaziun da la forza idraulica grischuna ha Repower investì sistematicamain en l'engrondiment da sia rait da distribuziun. Uschia stgaffescha l'interpresa las premissas per integrar a moda fidada la producziun d'electricitad creschenta or d'implants solars en il Grischun.

Repower guarda enavos sin in emprim mez onn positiv. Il resultat operativ avant tschains e taglias sin il retgav (EBIT) importa 51 miu. francs, il gudogn da gruppa 34 miu. francs. Cun ina quota d'agen chapital da 58 pertschient ha Repower vinavant ina basa finanziaria solida. Quella stgaffescha las premissas per promover sistematicamain las investiziuns strategicas.

Diminuì il resultat ha cunzunt l'idrologia debbla. La producziun d'electricitad en las atgnas ovras idraulicas è stada l'emprim mez onn 2026 cleramain sut la media da blers onns. Suentar in enviern cun pauca naiv è er la marschauna stada pitschna. Ultra da quai è la plievgia dals mais da primavaira e da l'entschatta da la stad stada cleramain sut la media da blers onns.

En l'Italia è la producziun d'electricitad dals implants regenerabels restada levamain sut las aspectativas, dentant in zic sur il nivel da l'onni passà. L'ovra da gas cumbinata Teverola è vegnida en funcziun be punctualmain pervi da restricziuns tecnicas.

La cumpetenzza commerciala renda en in martgà volatil

L'ambient da martgà dal commerzi d'electricitad è stà pretensius e volatil era l'emprim mez onn 2026. Cun l'extensiun da l'energia solara èn las uras cun pretschs d'electricitad negativs e quellas cun pretschs maximalis s'augmentadas vinavant. Capacitads da producziun flexiblas èn uschia daventadas pli impurtantas. Repower ha nizzegià cun success sia cumpetenzza da commerzi e da gestiun en quest ambient. In effect positiv sin il resultat da commerzi han già ils pretschs da martgà pli auts en Svizra ed en Frantscha. Per part han quels cumpensà ils effects negativs da la producziun d'electricitad pli bassa pervia da l'idrologia debbla.

Ils resultats dal commerzi internaziunal èn restads sco spetgà sut ils buns resultats dals onns

precedents. Quels avevan anc profità fin il 2025 da vendas d'electricità che Repower aveva fatg durant la fasa da pretschs auts al cumenzament da la guerra en l'Ucraina ils onns 2022 e 2023 a cundiziuns attractivas per periodas da furniziun posteriuras. Questas furniziuns èn per gronda part concludidas e n'influenzeschan betg pli il resultat da l'emprim mez onn 2026.

Investiziuns strategicas en la producziun e la rait da distribuziun

Repower promova consequentamain il mantegniment ed il svilup da las energias regenerablas. L'emprima mesadad da l'onn ha ella investì totalmain 57 miu. francs. La renovaziun da l'ovra idraulica da Silvaplauna è vegnida terminada cun success. L'implant solar alpin Madrisa Solar ha surpassà las spetgas suenter sia messa en funcziun parziala l'emprim enviern ed ha produci dapli electricità che prognostigà.

In term impurtant ha era cuntanschì il project Chlus cun inoltrar la dumonda d'approvaziun dal project. Uschia stgaffescha Repower las premissas per realisar pli tard in'ovra idraulica d'impurtanza naziunala e fa avanzar il project tenor plan.

En il rinforzament ed en la renovaziun da sia rait da distribuziun da var 3'000 kilometers en il Grischun ha Repower investì l'emprim mez onn 21 miu. francs. Repower sustegna uschia era l'extensiun da la fotovoltaica en il Grischun cun integrar effizientamain implants solars privats. L'emprima mesadad da l'onn 2026 è vegnì collià l'implant nr. 3'500 cun la rait da distribuziun.

La tariffa d'electricità variabla distgargia la rait da distribuziun

Per promover in'utilisaziun pli effizienta da la rait electrica introducescha Repower a partir dal 2027 per sias clientas e ses clients d'electricità en il provediment da basa la nova tariffa d'electricità variabla Optima. Cun Optima maina Repower a partir dal 2027 ad in cumportament da consum che serva a la rait e pussibilitescha a las clientas ed als clients d'optimar lur custs d'electricità.

La furniziun dal smart meter en il territori da provediment va tenor plan. Actualmain possedan radund dus terzs da la clientella d'electricità en il territori da rait in smart meter. Cun mintga smart meter che vegn installà da nov sa meglierescha la basa da datas per in manaschi da la rait effizient e per ina planisaziun da la rait prospectiva.

Repower Italia cun in svilup stabil

La fatschenta da distribuziun en l'Italia, nua che Repower furnescha cunzunt interpresas pitschnas e mesaunas cun electricità e gas, è levamain sut il nivel da l'onn passà. Tut en tut resta Repower Italia dentant stabila e resistent en in ambient da martgà pretensius e cun gronda concorrenza.

Repower promova il svilup da las energias regenerablas en l'Italia ed investescha en differents projects d'energia da vent e d'energia solara. Il pli grond project vegn realisà actualmain a Ciminna en Sicilia. L'implant agrivoltaic cun ina surfatscha da radund 200 plazzas da ballape è curt avant la terminaziun.

Perspectiva

Repower guarda plain speranza sin il segund mez onn 2026. La basa finanziaria solida permetta a

l'interpresa d'investir vinavant sistematicamain en la renovaziun e l'engrondiment dals stabiliments da producziun e da l'infrastructura da rait. Il resultat da fatschenta vegn influenzà da l'ulteriur svilup dals martgads d'energia sco era da la producziun da las atgnas ovras electricas. Per la forza idraulica è la quantitat da la plievgia e las affluenzas d'aua da grond'importanza. Repower fa frunt a quests facturs d'influenza cun gestir sias posiziuns da producziun e da commerzi a moda prospectiva. Per l'onn da gestiun 2026 spetga Repower vinavant in solid resultat.

Cifras-clav da la gruppa Repower

Resultat semestril 2026

en miu. francs	1. semester 2026	1. semester 2025	mutaziun
EBIT	51	65	-22 %
gudogn da la gruppa	34	47	-28 %
prestaziun generala	939	1'080	-13 %
summa da bilantscha	2'113	2'010	+5 %
agen chapital	1'223	1'177	+4 %
quota da l'agen chapital (pertschient)	58	59	-2 %
investiziuns (materialas ed immaterialas)	57	53	+8 %
fluss monetar da l'activitad commerziala	111	62	+79 %
collavuratur:as (dumber)	745	739	+1 %

Avis

- Infurmaziuns finanzialas ed il rapport semestril 2026 cumplet da Repower èn disponiblas sin repower.com/investors.
- Il rapport semestril cumpara en tudestg, talian ed englais en furma electronica. En cas dad interpretaziuns differentas è il text tudestg decisiv.
- En quest text vegnan exprimidas aspectativas e supposiziuns davart pussaivels svilupps futurs. Questas decleraziuns èn suttamessas a malsegirezzas ed a ristgas. Il svilup effectiv po pia differir da las constataziuns formuladas qua.

Contact

Stefan Bisculm
manader post da medias
m +41 81 423 77 00
medien@repower.com

Quai è Repower

L'interpresa Repower è dapi 120 onns activa sco producenta d'electricitad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Glion, Grono, Küblis, Landquart, Turitg e Milaun. Repower è activa lung l'entira chadaina da valurisaziun da l'electricitad, da la producziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovras idraulicas. En l'Italia è Repower ina da las pli grondas furnituras d'electricitad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.